



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

ZL.Anr.31/2025

PANELI ZGJEDHOR PËR ANKESA DHE PARASHTRESA (PZAP), në panelin e përbërë nga gjyqtarët: Kujtim Pasuli, kryesues, Ramush Bardiqi dhe Hidajete Gashi Alaj anëtarë, duke vendosur lidhur me ankesën e parashtruar nga Subjekti Politik Jedinstvena Goranska Partija (JGP), me seli në Dragash, paraqitur kundër vendimit të Komisionit Qendror të Zgjedhjeve (KQZ) Nr.01/2348-2025 të datës 06.09.2025, për Miratimin e Rekomandimit të Përbërjes së Këshillave të Vendvotimeve e Rregullta dhe me Kusht, për Zgjedhjet Lokale në Republikën e Kosovës, që do të mbahen me datë 12.10.2025, në seancën e panelit të mbajtur më datë 11.09.2025, mori këtë:

V E N D I M

REFUZOHET e pabazuar ankesa ZL.Anr.31/2025 e datës 10.09.2025 e parashtruar nga Subjekti Politik Jedinstvena Goranska Partija (JGP), me seli në Dragash, të paraqitur ndaj Vendimit të Komisionit Qendror të Zgjedhjeve KQZ, Nr.01/2348-2025, i datës 06.09.2025, për Miratimin e Rekomandimit të Përbërjes së Këshillave të Vendvotimeve të Rregullta dhe me Kusht, për Zgjedhjet Lokale në Republikën e Kosovës, që do të mbahen më datë 12 Tetor 2025.

A r s y e t i m

Më datë 10.09.2025, Subjekti Politik Jedinstvena Goranska Partija (JGP), ka paraqitur ankesë në PZAP, me të cilën pretendohet se KQZ, në vendimin e nxjerrë në lidhje me shpërndarjen e Komisionarëve të vendvotimeve për zgjedhjet që do të mbahen më 12 tetor 2025, është vërejtur një zvogëlim i jashtëzakonshëm i numrit të komisionerëve që u caktohen partive të komuniteteve, ashtu që shpërndarja e komisionerëve nuk është kryer në bazë të kriterëve të drejta, pasi partitë parlamentare dhe ato jashtëparlamentare janë trajtuar në mënyrë të barabartë, duke shtuar se partitë kryesore kanë ruajtur numrin e tyre të komisionerëve, ndërsa partitë tjera përfshirë ato të përfaqësuara në Kuvend, janë prekur ndjeshëm nga kjo shpërndarje. Po ashtu parashtruesi i ankesës thekson se kjo situatë dëmton parimin e drejtësisë dhe transparencës së procesit zgjedhor, rrezikon integritetin e votës, duke favorizuar disa subjekte politike në kurriz të tjerëve, dhe që minon besimin e qytetarëve dhe subjekteve politike në procesin zgjedhor. Parashtruesi i ankesës ka propozuar PZAP-së, që ta anuloj vendimin mbi shpërndarjen e komisionerëve, duke siguruar që numri i tyre të jetë i barabartë dhe proporcional, në përputhje me ligjet përkatëse, të sigurojë që partitë e komuniteteve dhe partitë tjera parlamentare të mos dëmtohen, duke garantuar përfaqësim të drejtë në të gjitha

vendvotimet, dhe të marrë masa që KQZ të zbatoj standardet ligjore dhe kushtetuese në organizimin e procesit zgjedhor.

Në përgjigjen e KQZ-së, kanë theksuar se gjatë vendimmarrjes për përbërjen e Këshillave të Vendvotimeve të Rregullta dhe me Kusht ka marr për bazë nenin 64 paragrafi 2.10, nenin 75, 76 dhe 77 të Ligjit Nr.08/L-228, për Zgjedhjet e Përgjithshme në Republikën e Kosovës, si dhe nenin 2 paragrafi 2, 3 dhe 4, neni 3 paragrafi 1, paragrafi 2, nën paragrafi 2.1 dhe 2.2, paragrafi 1,2,3 dhe 4 dhe neni 3 paragrafi 1,2 nën paragrafi 2,1 dhe 2.2 të Rregullores Zgjedhore Nr.11/2024 Këshillat e Vendvotimeve. Tutje shtojnë se pretendimet e palës ankuese se vendimi i KQZ-së, Nr.01/2348-2025, për Miratimin e Rekomandimit për Përbërjen e Këshillave të Vendvotimeve të Rregullta dhe me Kusht për zgjedhjet lokale në Republikën e Kosovës, që do të mbahen më 12 tetor 2025, se janë dëmtuar nga vendimi i lartë cekur pasi që shpërndarja e KVV nuk është bërë si në të kaluarën dhe se subjektet e mëdha politike kanë ruajtur numrin e komisionerëve janë të pa bazuara për arsyeje se KQZ gjatë ndarjes së vendeve në Këshillat e Vendvotimeve është mbështetur në nenin 3 paragrafi 1 Rregullores Zgjedhore Nr.11/2024, për Këshillat e Vendvotimeve, sipas të cilit përfaqësimi në KVV u takon: subjekteve politike të certifikuara të cilat kanë kaluar pragu zgjedhor në zgjedhjet e fundit nacionale, Subjektet Politike të cilat i janë nënshtruar dhe kanë kaluar pragu zgjedhor janë: Lëvizja Vetëvendosje (42.30 %), Partia Demokratike e Kosovës (20,95%), Lidhja Demokratike e Kosovës (18,27%), Aleanca për Ardhmërinë e Kosovës (7,06%).

Prandaj bazuar në nenin 3 par, 1 të Rregullores Zgjedhore Nr.11/2024 Këshillat e Vendvotimeve, Përfaqësimi në KVV "KQZ fton subjektet politike të certifikuara të cilat kanë kaluar pragu zgjedhor në zgjedhjet e fundit nacionale që të nominojnë nga 1 anëtar të KVV-ve".

Gjithashtu në përgjigje është theksuar se KQZ, ka vendosur edhe për përfaqësimin në KVV, duke u mbështetur në përkufizimet e nenit 2 të Rregullores Zgjedhore Nr.11/2024, për Këshillat e Vendvotimeve parashihet që: kujdeset që të sigurojë përfaqësimin e drejtë në KVV, për të gjitha komunitetet, duke u bazuar në: 2.1. "Numër të dallueshëm të popullatës brenda një komune"; 2.2. "numrin e votave të subjekteve politike të secilit komunitet, në nivel vendi dhe në nivel komunal".

KQZ, subjektit politik Jedinstvena Goranska Partija në komunën e Dragashit i ka ndarë 26 anëtar të KVV-ve dhe 2 anëtar rezervë, gjithsej 28 anëtar që do të thotë se ky subjekt është i përfaqësuar në komunën e Dragashit, komuna e vetme ku ky subjekt politik garon.

Po ashtu, edhe kandidatit të pavarur nga ky komunitet në komunën e Dragashit, KQZ i ka ndarë 4 anëtar të KVV dhe 2 rezerve gjithsej 6 anëtar të KVV-ve.

Paneli Zgjedhor për Ankesa dhe Parashtrësia – PZAP, pas shqyrtimit të ankesës dhe shkresave të lëndës, pretendimeve ankimore, përgjigjes në ankesë, gjeti se:

- **Ankesa është e pabazuar.**

Sipas vlerësimit të Panelit pretendimet ankimore të parashtruesit të ankesës se Vendimi Nr.01/2348-2025, i datës 06.09.2025 për Miratimin Rekomandimit të Përbërjes së Këshillave të Vendvotimeve në Vendvotimet e Rregullta dhe me Kusht, lidhur me shpërndarjen e Komisionarëve të vendvotimeve që u caktohen partive të komuniteteve janë të pa bazuara.

Neni 77 paragrafi 5 i ligjit Nr.08/L-228, ku parashihet që *”Kundër vendimit të KQZ-së për mos emërimin kryesuesit dhe anëtarëve të vendvotimit, subjektet politike dhe palët tjera me interes juridik mund të paraqesin ankesë në PZAP, brenda 48 orëve nga shpallja e vendimit nga KQZ.*

Me dispozitën e nenit 77 paragrafi 3 i Ligjit Nr.08/L-228, për Zgjedhjet e Përgjithshme, parashihet që: *”Kryesuesit e këshillave të vendvotimeve zgjidhen në mënyrë të barabartë në mesin e katër (4) subjekteve politike të certifikuara që kanë fituar numrin më të madh të votave për Kuvendin e Kosovës gjatë zgjedhjeve të fundit në atë komunë”.* Ndërsa paragrafi 4, i po të njëjtit nen parasheh që: *”Pavarësisht paragrafit paraprak të këtij neni, në rast se kërkohet, KQZ-ja ka kompetenca për të emëruar sipas zgjedhjes së saj anëtarët e KKV-ve, të cilët nuk përmbushin kushtet sipas këtij neni”.*

Me dispozitën e nenit 20 paragrafi 1 i Rregullores Zgjedhore 16/2024, Qendrat Komunale të Numërimit parasheh që: *”KQZ, me vendim, përcakton numrin e ekipeve të numërimit dhe numrin e anëtarëve brenda ekipeve të numërimit, sipas specifikave të komunave përkatëse”.* Paragrafi 2 i Rregullores parasheh që: *”Kryesuesit e ekipeve të numërimit, zgjedhën në mënyrë të barabartë nga katër subjektet e para që kanë fituar numrin më të madh të votave për Kuvendin e Kosovës gjatë zgjedhjeve të fundit në atë komunë dhe janë certifikuar për pjesëmarrje në zgjedhjet aktuale”.* Ndërsa paragrafi 4 i kësaj rregullore parasheh që: *”Procedura e nominimit dhe emërimit të ekipeve të numërimit bëhet në pajtim me procedurat e përcaktuara në Rregulloren Nr. 11/2024 Këshillat e Vendvotimeve”.* Ndërsa në nenin 3 paragrafi 2 të Rregullores Zgjedhore Nr.11/2024, për Këshillat e Vendvotimeve parashihet që: *”KQZ kujdeset që të sigurojë përfaqësimin e drejtë në KVV, për të gjitha komunitetet, duke u bazuar në: 2.1. Numër të dallueshëm të popullatës brenda një komune; 2.2. numrin e votave të subjekteve politike të secilit komunitet, në nivel vendi dhe në nivel komunal”.*

Andaj bazuar në dispozitat e sipërcituara ligjore Paneli ka gjetur se nuk qëndrojnë pretendimet ankimore të parashtruesit të ankesës se, me rastin e marrjes së vendimeve nga KQZ, nuk janë respektuar dispozitat ligjore nga neni 77 paragrafi 3 i Ligjit Nr. 08/L – 228 për Zgjedhjet e Përgjithshme, Rregullorja Zgjedhore Nr.16/2024 për Qendrat Komunale të Numërimit si dhe Rregullorja Zgjedhore Nr.11/2024 për Këshillat e Vendvotimeve. Kjo për faktin se me rastin e përcaktimit të numrit të ekipeve të numërimit ka zbatuar në tërësi dispozitat ligjore në fuqi krejt duke marrë parasysh rezultatet zgjedhore të fundit dhe renditjes së subjekteve politike, përfshirë edhe subjektin politik ankues. Kjo pasi që subjektit politik Jedinstvena Goranska Partija në Komunën e Dragashit i është dhënë përfaqësim nga ana e KQZ-së, për 26 anëtar të KVV-ve dhe

2 anëtar rezervë, gjithsej 28 anëtar që do të thotë se ky subjekt është i përfaqësuar në Komunën e Dragashit, komuna e vetme ku ky subjekt politik garon. Po ashtu, edhe kandidatit të pavarur nga ky komunitet në komunën e Dragashit, KQZ i ka ndarë 4 anëtar të KVV-ve dhe 2 rezerve gjithsej 6 anëtar të KVV-ve.

Duke marrë parasysh të lartpërmendurat, Paneli vlerëson se parashtuesi i ankesës në mbështetje të pretendimeve të tij, nuk ka ofruar dëshmi të qarta dhe bindëse, edhe pse në bazë të nenit 117 paragrafi 3 të LZP-së, barra e të provuarit bie mbi ankuesin, në të cilin nen në mënyrë decitive thuhet se *“Vendosja për ankesat nga PZAP-ja mbështetet në dëshmi të qarta dhe bindëse”*.

Prandaj, duke u mbështetur në nenin 117.3 të Ligjit Nr. 08/L – 228 për Zgjedhjet e Përgjithshme në Republikën e Kosovës, Paneli vlerësoj se pretendimet e tilla të palës ankuese janë të paqëndrueshme dhe si të tilla i refuzoi të pabazuara.

Janë vlerësuar edhe pretendime tjera ankimore të parashtresit të ankuesit, por paneli nuk ka gjetur se nga vendimet e atakuara janë përfshirë me ndonjë shkelje, prandaj të gjitha pretendimet janë vlerësuar si të pabazuara.

Prandaj, nga arsyet e parashtuara më lart bazuar në nenin 117.3 dhe 119. 3 të Ligjit Nr. 08/L – 228 për Zgjedhjet e Përgjithshme në Republikën e Kosovës, u vendos si në dispozitiv të këtij vendimi.

Paneli Zgjedhor për Ankesa dhe Parashtresa

ZL.Anr.31/2025, datë 11.09.2025



Këshilla Juridike: Kundër këtij vendimi është e lejuar ankesa sipas nenit 118 paragrafi 4 të LZP-së, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimit të këtij vendimi.